



TOROLALANA FANDRAFETANA FEHEZAM-PITSIPIKA MIKASIKA NY FANADIOVANA SY NY FIDIOVANA





Fidiniavo RAVOKATRA

*Ministry ny Rano, ny Fanadiovana sy ny Fidiovana
15 Oktobra 2022*

« Ny fahasalamana no voalohan-karena ary ny fidiovana no antoky ny fahasalamana ».

Noho ny fahatsapana ny maha-zava-dehibe ny fahadiovana, ary indrindra ho fampiroboroboana ny lafiny Fidiovana, izay andraikitra manokana sahanin'ny Ministeran' ny Rano, Fanadiovana sy Fidiovana, ireo tompon'andraikitra eto anivon'ny Ministera, miaraka amin'ireo Ministera mpiara-miasa sy ireo mpiara-miombon'antoka aminy, dia manolotra ity boky ity mba ho torolalana ho an'ny Kaominina, hanampiana ireo Ben'ny Tanàna amin'ny fandrafetana ny Fehezam-pitsipika mikasika ny Fanadiovana sy Fidiovana.

Anjaran'ireo Kaominina isan-tokony ny fandrafetana sy fampanarahana izany mba hifandraika amin'ny filàna sy ny zava-misy eo amin'ny fari-piadiidany.

Tanjona kendrena ny fametrahana ny lamina mba ho fitandroana ny fahadiovana, izay singa lehibe iray tsy azo lavina fa miantoka ny fiarovana ny fahasalamam-bahoaka.

Eto anivon'ny Ministera dia misy sampan-draharaha manokana misahana ny fanabeazana ny olom-pirenena. Araka izany, dia anisan'ireo zava-kendrena tamin'ny famolavolana ity boky ity ny fanentanana sy famporisihana ny tsirairay hikajy ny fahadiovana manomboka amin'ny isam-batan'olona, isan-tokantrano ary eny anivon'ireo toerana ifamezi-vezen'ny besinimaro, mba ho fikatsahana ny tombontsoa iombonana. Ny fitandroana ny fahadiovana dia fihetsika mendrika maneho ny fanajanao ny tenanao ary fanajanao koa ny hafa.



FARITRA

DISTRIKA

-----****-----

KAOMININA

-----****-----

Didim-pitondrana laharana momba ny fehezampitsipika mikasika ny fahadiovana, ny fahasalamana, ny filaminan-tsaina ary ny filaminam-bahoaka eto amin'ny Kaominina

Ny Ben'ny Tanàna, eto amin'ny Kaominina Ambanivohitra/Ambonivohitra ...

- Araka ny Lalam-panorenana ;
- Araka ny lalàna fehizoro 2014-018 tamin'ny 12 septambra 2014 mikasika ny fandaminana, fitantanana ary ny andriakitry ny Vondrombahoaka Itsinjarampahefana;
- Araka ny lalàna 98-029 tamin'ny 20 Janoary 1999 mifehy ny rano ;
- Araka ny Lalàna faha-2011-002 tamin'ny 15 Jolay 2011 mamaritra ny fehezam-pitsipika mikasika ny fahasalamana;
- Araka ny Lalàna 2014-020 tamin'ny 27 septambra 2014 mikasika ny loharanom-bolan'ireo vondrombahoakam-paritra itsinjarampahefana, ny fombafomba fifidianana, ny fandaminana sy ny fomba fiasa ary ny andraikitry ny rafitr'izy ireo;
- Araka ny Didim-panjakana laharana faha- 96-583 tamin'ny 17 Jolay 1997 manova sy mameno ny andininy sasan-tsasany ny didim-panjakana laharana faha-95-291 tamin'ny 18 Aprily 1995 izay hanaovana fandaminana ny toeram-panagiazana;
- Araka ny Didim-panjakana laharana faha-2015-960 tamin'ny 16 Jona 2015, mametra ny andraikitra sahanin'ny lehiben'ny rafitra mpanatanteraka eo anivon'ny vondrom-bahoakam-paritra itsinjaram-pahefana;
- Araka ny Didim-pitondrana laharana faha-1238 SAN tamin'ny 16 Jolay 1960 mamaritra ireo fepetra fampandehanana ny sampandraharahan'ny fitandrovana ny fahasalamana ankapobeny anatin'ireo Kaominina;
- Araka ny fanapahana laharananoraizin'ny filankevitra Monisipaly/Kaominaly tamin'ny

FEHEZAMPITSIPIKA MONISIPALY NA KAOMINALY MISAHANA NY FIKOLOAM-PAHASALAMANA

ZAVA-KENDRENA

Ity Fehezam-pitsipika ity no mametra ny fitandroana ara-panjakana ny filaminana ho an'ny Kaominina, izy no mamaritra ireo fitsipika hisorohana sy hamerenana amin'ny laoniny ny fahadiovana, ny fandriampahalemana ary ny filaminam-bahoaka eto amin'ny faritry ny Kaominina.

TOKO I. IREO TOMPON'ANDRAIKITRY NY FITANDROVANA NY FAHADIOVANA:

SOKAJY 1: NY KOMITY MISAHANA NY FIDIOVANA SY NY FANADIOVANA

ANDININY 1 : Andraikitra ny Kaominina no mametraka ny komity misahana ny fidiovana sy ny fanadiovana izay hanaramaso ny fepetra rehetra momba ny fanadiovana sy ny fidiovana eny ifotony.

SOKAJY 2: NY LEHIBEN'NY FOKONTANY

ANDININY 2 : Ny Lehiben'ny fokontany no tompon'andraikitra voalohany afaka mangataka ny fitsaharan'ny fandikan-dàlana momba ny fanadiovana sy fidiovana eny anivon'ny Fokontany tsirairay eto amin'ny Kaominina, ary afaka mampihatra ny dinam-pokontany efa notapahina tamin'ny fivoriam-be-pokonolona ary manao ny tatitra rehetra any amin'ny Kaominina isan-kerinandro.

SOKAJY 3: NY SAMPANA TEKNIKAN'NY KAOMININA

ANDININY 3 : Ny Sampana Tekinikan'ny kaominina no misahana manontolo ny fidiovana sy fanadiovana eto anivon'ny Kaominina ary mampihatra ny sazy mifandraika amin'ny fandikan-dalàna sy ny fanaraha-maso ny Komity misahana ny fanadiovana sy ny fidiovana,
Ireo "Quartiers mobiles" sy "polisy kaominaly" no iraka hanao fampitandremana sy hampihatra ny sazy ary azo omen'ny Zandarimaria na polisim-pirenena tolotàna.

TOKO II. NY FAHADIOVAN'NY TOERAM-PONENANA SY NY MANODIDINA AZY

SOKAJY 1 : NY TOERAM-PONENANA SY NY MANODIDINA

ANDININY 4 : Ny fanorenana rehetra anatin'ny faripeadidian'ny Kaominina dia tsy maintsy nahazoana alalana ara-dalàna avokoa.

ANDININY 5 : Ny tompotrano na izay mipetraka ao dia samy tompon'andraikitra feno amin'ny fahadiovan'ny trano fonenany sy ireo miankina aminy ary ny lalana manoloana azy.

ANDININY 6 : Ny trano fonenana na trano ampiasain'ny besinimaro dia tsy maintsy manana kabone iray • isan-trano ary tsy maintsy ezahana ny fikojana, ny fanatsarana hatrany ary ny fahadiovan'izany.

SOKAJY 2 : NY LAVAPIRINGA

ANDININY 7 : Voarara ny mampiasa kabone lavaka madiva ho feno.

ANDININY 8 : Voarara ny mangery sy mamany eny amin'ny toerana tsy voatokana amin'izany.

Raha toa ka mety hiteraka fitarainana marimpototra ny kabone na amin'ny lafiny fahadiovana na amin'ny lafiny fofona, dia mandray ny fepetra rehetra ilaina ny tompotrano na izay mipetraka ao, ny fokontany, ny kaominina dia tsy maintsy manatanteraka izany ao anatin'ny iray volana, raha tsy izany dia hambara fa tsy azo onenana ny toerana. Ny filazana ny tsy maha ara-pahasalamana dia amin'ny alalan'ny tatitra izay ataon'ny Fokontany /kaominina voamarin'ny Lehiben'ny sampama monisipaly /kaominaly. Izany dia midika ho fandrarana tsy fahazoana monina ao amin'ny trano izay lazaina fa mamparary.

ANDININY 9 : Any amin'ny toerana ampiasain'olona maro, ny isan'ny kabonedia faritan'ny sampandraharaham-panjakana ao anatin'ny fahazoandalana hanorina, izay ampifanarahiny amin'ny isan'ny olona mety hampiasa izany kabone izany.

ANDININY 10 : Ny biraom-panjakana rehetra sy ny toerana ivezivezin'ny olona dia tokony misy kabone sy toerana fanasana tàmàna miaraka amin'ny savony avokoa.

ANDININY 11 : Voarara ny manao “puisard direct” amin'ny làlan-drano ary ireo tatatra iombonana.

SOKAJY 3 : NY FIKORIANAN'NY RANON'ORANA SY NY RANO MALOTO ARY NY LAKANDRANO

ANDININY 12 : Ireo tompotrano na mponina dia tsy maintsy mandray ireo fepetra ilaina rehetra mba handehanan'ny ranonorana amin'ny fantsona ka tsy manelingelina na manimba ny filaminan'ireo mpiara-monina. Ny fanorenana vaovao rehetra akaiky lalana misy fantsona, dia tsy maintsy miomana ny hanary avy hatrany any ambany tany ireo ranonorana sy rano avy nampiasaina an-tokantrano. Ny fanariana ny ranonorana sy ny rano maloto dia tokony manaraka ny lakandrano izay efa nafantoky ny Kaominina amin'izany; ary tsy natao ho fanariana fako mba hisorohana ny fahatsetsenana.

ANDININY 13 : Voarara tanteraka ny manipy rano maloto avy eny ambaravarankely na ny manary izany amin'ny lalam-bahoaka. Voarara ihany koa ny manipy anaty lakandrano, renirano, farihy na ny mametraka amin'ny sisiny ireo fako, potipoti-javatra isan-karazany, indrindra ny akora simika, ny diky sy ny rano misy menaka.

ANDININY 14 : Ireo rano avy amin'ny orinasa mpanodina sy ny toeram-pitsaboana dia tsy azo ariana ao anaty tatatra mihitsy. Tokony handalo fikajiana mialoha mifanaraka amin'ny karazany ireny izay hiantsohohan'ireo voalaza etsy ambony. Amin'ny lafiny rehetra, ny fanariana na fandefasana ny faika rehetra avy amin'ny orinasa mpanodina dia tsy maintsy manaraka ny toromarika voarakitra ao amin'ny tondrozotran'ny fiantraikan'ny asa sahanin'ny orinasa: Lalana faha 99-021 tamin'ny 19 aogositra 1999, momba ny politika fitantanana sy fanaraha-maso ny loto indostrialy). Voarara tanteraka ny fanipazana ranontsolika eny amin'ny fantsona fanarian-drano.

ANDININY 15 : Ny fanasana fiarakodia rehetra sy hafa amin'ny lalam-bahoaka sy ireo miankina aminy dia voarara.

ANDININY 16 : Ireo mpampiasa sy tompon'andraikitra ny toeram-patsakana dia tsy maintsy mandray fepetra mba tsy hisian'ny fiandronan'ny rano amin'ny manodidina mivantana ny fatsakana.

ANDININY 17 : Voarara ny fanasana lamba, ny fanasana fitaovan-dakozia, ny fanadiovana ny vatana, ny fanasana fiarakodia, indrindra ny fampidirana tay na akora hafa mety handoto ny loharano izay mamatsy ny rehetra sy ny fatsakam-bahoaka.

ANDININY 18 : Voarara ny manary ireo fatim-biby, ireo sisa avy amin'ny fivarotan-kena, zezik'omby, na tay hafa, amin'ny ankapobeny dia ny sisam-biby mora lo anaty lavaka, ka mety handoto ny rano natao hosotroina.

SOKAJY 4 : NY FAKO

ANDININY 19 : Ny fako dia tsy maintsy ho entina isanandro ivelan'ny toeram-ponenana ary apetraka any anatin'ny toerana voatokana ho an'ny zay manana izany amin'ny ora voafetra. Ny tsy fanarahan'ny rehetra ireo ora ireo dia iharan'ny sazy vonodina.

ANDININY 20 : Ny fandoroana biriky, fako plasitika fakon-kanikany, fandrendrehana tara dia voarara raha tsy misy fahazoan-dalana avy amin'ny Kaominina izay manaraka ny taridalana sy fenitra avy amin'ny Minisiteran'ny Tontolo lainana.

ANDININY 21 : Ny fako avy ao amin'ny tokantrano dia makany amin'ny baka fanariam-pako ikambanana. Voarara ny manary ny amany sytay ary amin'ny ankapobeny ireo fako azo avy amin'ny fanorenana, fanatanterahana asam-barotra sy ny orinasa mpanodina toy ny fanitso, tavoahangy, sns ..., mety hanimba ny fahasalamana any anaty baka fanariampako ikambanana. Ireo zavatra ireo dia taterin'ny tompony na ny orinasa na mety ho ny sampandraharaha misahana ny fanadiovana - ka andoavany vola izany – mankany amin'ny fitobiam-pako voatokana amin'izany.

ANDININY 22 : Raràna ihany koa ny manipy eny amin'ny lalambahoaka sy ireo miankina aminy toy: ny sisindalana, sy ny lakandrano ary ny fantsona fanarian-drano maloto, ireo rano tsy ara-pahasalamana, fako, fotaka, fako avy any an-tokatrano, diky, fakon-dakozia ary ireo zavatra hafa rehetra mety hiteraka fanimbana, na hisakana ny fikorianan'ny ranonorana, na hanelingelina ny fifamoivoizana, na hanimba ny fahasalamana na hanakorontana ny filaminam-bahoaka. Ny fandikana ampahibemaso izay voalazan'ny andalana faharoa eo ambony dia mitarika fanasaziana ara-panjakana mifototra indrindra amin'ny fitandroana ny fahasalamam-bahoaka amin'ny famerenana amin'ny laoniny ny fahadiovan'ny toerana sy ny manodidina azy miampy fandoavana ny sazy vonodina voatondro ho amin'izany.

ANDININY 23 : Ireo tomponandraikitra ny Fokontany dia manara-maso ny fiasan'ny lakandrano fanariana rano maloto sy ny tsy hisian'ny rano miandrona na fako amin'ny lalankely ao amin'ny faripiadidiana.

ANDININY 24 : Ny Fitantanana ny fako eny anivon'ny Tobimpahasalamana dia manaraka ny politika nasionaly ny fitantanana ny fako vokarin'ny Tobimpahasalamana.

ANDININY 26 : Ny fitantanana ny Fakon'ny Orinasa lehibe dia tsy maintsy manaraka ny Lalana faha 99-021 tamin'ny 19 aogositra 1999 (momba ny politika fitantanana sy fanaraha-maso ny loto indostrialy).

SOKAJY 5 : NY FIOMPIANA BIBY

ANDININY 27 : Ny fiompiana akoho amam-borona mihoatra ny ... kisoa, soavaly, omby, ondry sns indrindra ny andrenivohitra dia tsy maintsy mahazo alalana avokoa amin'ny kaominina taorian'ny nametrahana fangatahana an-tsoratra nataon'ny ny tompony. Ny Fahazoan-dalana no mamaritra ireo fepetra ara-tekinika, indrindra ny elanelana tokony ho hajaina amin'ny trano hafa sy ny andraikitra ara-pahasalamana sy ny filaminam-bahoaka tsy maintsy mifanaraka amin'ireo didy amam-pitsipika manankery. Ny fiovan-toerana rehetra sy ny fanorenana vaovao rehetra amin'ny taona diavina dia tsy maintsy hanaovana filazana ao anatin'ny iray volana.

ANDININY 28 : Ny fahadiovan'ireo toerana rehetra natokana hiompiana voalazan'ny andininy teo aloha dia tsy maintsy

tandrovana lalandava. Ny trano fiompiana dia tsy maintsy haorina amin'ny toerana mifefy, madio, mora sasana, tany maina, izay misy tafo ary azon'ny rivotra. Tomponandraikitra feno amin'izay fahasimbana, na fandotoana, na fifindran'aretina ateraky ny fireniren'ireny biby ompiany ny tompony, ka raha misy fitantarainana mikasika ny fiompiana dia tomponandraikitra ny Mpiompy.

ANDININY 29 : Ny fireniren'ny biby fiompy dia voarara ary sokajiana ho mpirenireny ireo biby tsy misy mpiahy sy ireo tsy arahan'ny tompony.

ANDININY 30 : Ny fivezivezen'ny biby dia voarara raha tsy nisy ny fahazoan-dalana avy amin'ny Fokontany.

ANDININY 31: Ny alika dia tokony hifatotra sy hisy fehitenda mba hanavahana azy amin'ny biby tsy misy mpiahy ary tokony ho vita vakisiny sy hanana karine mirakitra izany.

ANDININY 32 : Ny tsy fanarahana ireo fepetra voalazan'ity sokajy ity sy ny fisian'ny fangatahana na fitarainana avy amin'ny mpiara-monina izay voazaha fototra dia mety hiteraka ny fanesorana ny fahazoan-dalana sy fampiharana ireo sazy vonodina.

SOKAJY 6 : NY Hafa (ORINASA, ABATTOIR, SNS...)

ANDININY 33 : Ny hena amidy rehetra dia tsy maintsy misy fitomboky ny dokoteram-biby na ny sampandraharahan'ny fahasalamana ary mahazo fankatoavana manokana avy amin'ny service vétérinaire.

ANDININY 34 : Ny toerana famonoana biby dia tsy maintsy manaja ny fahadiovan'ny toerana.

ANDININY 35 : Tsy maintsy manana toerana fanariana fako, fitobian'ny rano maloto manokana ny toerana famonoana biby.

ANDININY 36 : Tsy maintsy vonoina amin'ny toerana voatondro ho an'izany dia ny labatoara ny biby hamidy eny an-tsena ary vita fizahana avy amin'ny tomponandraikitra afaka manao izany.

ANDININY 37 : Tsy maintsy misy fitomboky ny veterinerana na sampan-draharaha ara-pahasalamana misahana manokana izany mba ho voamarika fa azo antoka ara-pahasalamana ny hena amidy rehetra.

ANDININY 38 : Fitaovana madio no itaterana hena mankeny an-tsena ka asiana lafika ny ambany ary misy rakotra ety ambony samy madio voasasa amin'ny savony.

ANDININY 39 : Tsy avela hikasika amin'ny vatany na ny akanjon'ny mpilanja ny hena fa asiana lafika madio manelanelana.

ANDININY 40 : Ho an'ireo mpamono omby sy biby hafa na koa ireo mpitatitra ny hena, dia raràna ny fitondrana antsy mivezivezy sy ny fitondrana akanjo mihosin-drà eny amin'ny làlam-bahoaka.

ANDININY 41 : Tsy maintsy manao fizaham-pahasalamana isan-taona ny mpivarotra hena ary misy taratasy manamarina izany (Certificat medical) mba ahafahany manao ny asany. Ny fanamarinana avy amin'ny dokotera ny amin'ny fahafahana mivarotra dia tokony hita mandrakariva eny amin'ny toerampivarotana. Ny tsy fanatanterahana izany dia mitarika fampiatoana na fisintonana avy hatrany ny fahazoandalana izay tsy misakana ny fampiharana ny sazy vonodina voalaza.

ANDININY 42 : Tsy maintsy ambony latabatra voadio amin'ny rano sy savony no hivarotana hena ary ambony akalana madio no ikapana azy.

ANDININY 43 : Raràna ny manao saosisy na potikena amin'ny hena maimbo sy hena misy taolany.

ANDININY 44 : Tsy maintsy mampiasa tsofa na "la scie" ny mpivaro-kena hanapahana ny taolana.

ANDININY 45 : Rarana ny manasa tsinain-kena any amoron-drano.

ANDININY 46 : Manangana fikambanan'ny mpivarotra (hena, lamba, entana, hani-masaka) ara-dalana mba hifampifehy.

TOKO III. FANDRINDRANA NY LALAMBAHOAKA

SOKAJY 1 : FANDRINDRANA AMIN'NY ANKAPOBENY

ANDININY 47 : Voarara tanteraka ny manelingelina ny lalana sy izay miankina aminy, ny manakorontana ny filaminam-bahoaka ary ny manembatsembana ny firindran'ny fifamoivoizana ny amin'ny fandriampahalemam-bahoaka.

ANDININY 48 : Ny Kaomininadia nametraka manokana fotodrafitrasa ho an'ny fanadiovana sy fidiovana afaka ampiasain'ny daholobe. Araka izany, rarana ny mangery na mamany na mandrehoka na manary tay ankoatran'ny ao anivon'izany fotodrafitrasa izany.

ANDININY 49 : Rarana ny manary na manao maloto amin'ireto toerana ireto:

- Amin'ny toeram-piantsonana,
- Amin'ny toerana fanaovana fomban-drazana,
- Eny amoron'ny lalam-pirenena rehetra.

Ny Kaominina sy ireo koperativam-pitaterana dia miara-mametraka toeram-pivoahana manokana misy fanasana tànana amin'ny rano sy savony ho an'ireo mpampiasa lalam-pirenena.

Ny fahatratrarana ambodiombi ny fandikana izay voalazan'ny andalana etsy ambony dia mahatonga fanatanterahana sazy mifototra amin'ny famerenana amin'ny laoniny eo no ho eo ny fahadiovan'ny toerana ny fotodrafitrasa sy ny manodidina azy, ankoatra ny fandoavana sazy vonodina mifandraika amin'izany.

SOKAJY 2 : FIKORIANAN'NY RANO

ANDININY 50 : Ireo tanàna rehetra ambany lalana dia tsy maintsy mamela malalaka ny fikorianan'ny rano indrindra ny ranonorana.

ANDININY 51 : Voarara ny mamela ny fikorianan'ny rano mivantana avy amin'ny tafon-trano amin'ny lalam-bahoaka na amin'ny mpifanolo-bidirindrina. Ny ranonorana dia tsy maintsy akoriana amin'ny fantsom-pivoahana hatrany amin'ny fantsona akaiky indrindra aorian'ny fahazoana alalana mialoha avy amin'ny Ben'ny Tanàna.

ANDININY 52 : Ny fametrahana amin'ny lalana ireo fitarihana mba hikorianana sy hitsinjarana ny rano, dia tsy maintsy ahazoana alàlana mialoha avy amin'ny Ben'ny Tanàna. Ny fahazoandalana no mamaritra ireo fepetra hanatanterahana ny asa, indrindra ny fanokafana ireo tatatra, ny tsy maintsy hamerenana amin'ny laoniny ny lalana.

ANDININY 53 : Ny fanariana ny rano avy amin'ny tanàna manamorona mankao anatin'ny lalandriaka ambanin'ny lalambahoaka, dia tsy maintsy tarihina mivantana ka ny fitaovana sy ny fepetra amin'izany dia izay voalaza ao anatin'ny fahazoandalana.

Ny fivoahan'ny rano maloto avy ao an-tokantrano dia tokony tsy miparitaka eny amin'ny lalambe fa avily amin'ny alalan'ny fantsona mankany amin'ny fivoahandrano iombonana.

TOKO IV. NY FAHADIOVAN'NY TSENA

SOKAJY 1 : NY VAROTRA HANI-MASAKA

ANDININY 54 : Hentitra ny fandràna ny fivarotana hanimasaka ivelan'ny toerana voatokana sy nojariana manokana ho amin'izany ao anatin'ny tsena ho an'zay manana izany.

ANDININY 55 : Ny varotra hanimasaka sy sakafo fihinana dia tokony manaja ny fahadiovana na ho any hanimasaka hamidy na ho an'ny toerana hivarotana ; ary tsy maintsy ao anaty vatafitratra mihidy tsara izay tsy tafiditry ny bibikely na ny vovoka. Sakafo vao hatrany no atolotra ny mpanjifa ary tsy maintsy ampiasana fitaovana manokana sady madio ny fandraisana azy. Tsy maintsy manana toerana ahitana fitaovana fanasan-tanana miaraka amin'ny rano madio sy savony ny mpivarotra hanimasaka ary tsy maintsy manana rano fisotro madio, tahirin-drano ary fanariam-pako.

ANDININY 56 : Ny mpivarotra hanimasaka tsirairay dia tsy maintsy manana fahazoandalana manamarina ny nahazoana ny toerana fivarotana sy fankatoavan'ny sampandraharahan'ny fahasalamam-bahoaka mahefa miantoka ny fahatomombanan'ny sakafo amidy ary fanamarinam-pahasalamana manankery amin'ny taona diavina.

ANDININY 57 : Ny toerana nomena ireo mpivarotra hanimasaka dia tsy maintsy sasany sy diovin'ny alohan'ny hikatonany. Aorian'ny fikatonana, dia voarara ny fidirana ao anatin'izany na dia ho an'ny mpivarotra aza.

ANDININY 58 : Ny mpivarotra hanimasaka sy sakafo dia tsy maintsy ambony akalana miala fitopolo santimetatra (70 sm) amin'ny tany ary voaaro amin'ny loto.

ANDININY 59 : Ny fivarotana hanimasaka anatin'ny fiara dia mila fahazoandalana avy amin'ny Ben'ny Tanàna aorian'ny fankatoavan'ny Fitaleavana miandraikitra ny fahasalamam-bahoaka eo anivon'ny Kaominina. Ilay nahazo alalana dia tsy maintsy manatanteraka ireo adidy voasoratra ao anaty bokin-andraikitra.

ANDININY 60 : Ny bokin'andraikitra no mametra ireo sokajin-tsakafo na entam-barotra azo amidin'ireo fiara mpivarotra hanimasaka, ireo toerana azony hijanonana, ny haben'ilay fiarakodia, ny fanajariana anatin'ny.

ANDININY 61 : Ny fandikana ny iray amin'ireo fepetra voalazan'ny bokinandraikitra sy ny iray amin'ireo fepetra voalazan'ity andininy ity dia mahavoasazy ilay nanao izany araka ireo sazy anatin'ny vonodina.

ANDININY 62 : Tsy maintsy manatanteraka fanadiovana faobe ny tsena iarahan'ny mpivarotra.

SOKAJY 2 : NY VAROTRA SAKAFO MANTA

ANDININY 63 : Voarara ny fivarotana sakafo tsy ara-pahasalamana toy ny voankazo manta, sakafo efa lany andro sy efa simba indrindra manodidina ny faritry ny sekoly.

ANDININY 64 : Ny sakafo manta dia amidy amin'ny toerana voatokana amin'izany sy nahazoana alalana.

SOKAJY 3 : NY VAROTRA Hafa :

ANDININY 65 : Ny mpivarotra isan-karazany rehetra dia tsy maintsy manaja ny fahadiovan'ny toeram-pivarotany ka samy manana kifafa sy fanariampako tsirairay avy izay hametrahany ireo fako rehetra noho ny fanatanterahany ny asany. Ny fanariana izany fako sy karazam-pako izany anaty toerana iombonana dia tsy maintsy hataon'ireo mpivarotra ihany.

TOKO V. ARETI-MIFINDRA

ANDININY 66 : Ny olona rehetra izay mahafantatra fa misy aretina tsy maintsy anaovana fanambarana amin'ny manampahefana ny aretina nahafaty ny olona iray dia tsy maintsy manao izany tsy misy hatakandro na any amin'ny fraisana na any amin'ny tobimpahasalamana.

ANDININY 67 : Ho fisorohana ny areti-mifindra dia anjaran'ny komitin'ny fidiovana eny anivon'ny tobim-pahasalamana sy ny manampahefana isan- tsokajiny eo an-toerana ny manao fanentanana mahakasika ny fitandroana ny fidiovana amin 'ny vanim -potoana mialoha, mandritra, aorian 'ny fisehoan'ny aretina.

ANDININY 68 : Raha toa ka aretina tsy maintsy hanaovana fanambarana no miseho, ny manampahefana isan-tsokajiny (ny Sefo Fokontany, Ny Ben'nyTanana) dia tsy maintsy mampihatra ny fepetra famendrahana ranompanafody, izay heveriny fa ilaina amin'izany arakaraky ny karazan 'ny aretina voazaha fototra. Tsy maintsy atao vonona lalandava ireo fitaovana sy ranompanafody ampiasaina amin'izany. Ny komitin 'ny Fidiovana eny anivon 'ny Tobimpahasalamana sy eny anivon'ny Kaominina no tompon 'andraikitra voalohany amin 'ny fanatanterahana ireo fepetra rehetra iadiana amin'ny valan'aretina.

ANDININY 69 : Ho fampiharana ny andininy voalaza teo aloha (and.68) dia tsy maintsy atsongana ny "komitin 'ny fidiovana eny anivon 'ny tobim- pahasalamana" tsirairay.

ANDININY 70 : Fiara voatokana avy amin'ny sampandraharaha misahana ny fahasalam-bahoaka no itaterana ny marary voan'ny areti-mifindra ary tsy maintsy fendrahana ranompanafody mamono otrikaretina ny fiara raha vantany vao vita ny fanaterana ilay marary.

ANDININY 71 : Ny famendrahana fanafody amin'ny fiara ho famonoana otrikaretina dia tsy maintsy atao raha misy fanambarana areti-mifindra mitranga eny an-dalàna.

ANDININY 72 : Raha misy fahafatesana dia tsy maintsy misy dokotera mijery ny razana ary mahazo taratasy manamarina izany ny tompo-manjo. NY mpiasan'ny fraisana dia tsy mahazo manome ny taratasy fahazoandalana handevina raha tsy mahazo ny taratasy manambara fa efa voajerin'ny dokotera ny razana.

ANDININY 73 : Raha misy matin'ny aretina tsy maintsy ambara toy ny pesta na kôlera na Covid-19 dia tsy maintsy manaraka ireo fepetra rehetra takian'ny fitondram-panjakanaho amin'izany rehefa voamarin 'ny dokotera.

ANDININY 74 : Ny fakana sy famindran-toerana ny razana matin'ny pesta na kolera na Covid -19 dia tsy azo atao raha tsy feno ny fepotoana sy fepetra ahafahana manao izany ary tsy maintsy nahazoana alalana avy amin'ny ambaratonga mahefa.

TOKO VI. NY FILAMINAM-BAHOAKA

SOKAJY 1: NY FIVAROTANA ZAVAPISOTRO MISY ALIKAOLA

ANDININY 75 : Ankoatra ireo toerana voatokana nahazo alalana, dia voarara tanteraka ny fivarotana zavapisotro misy alikaola izay mitarika sazy vonodina.

Ireo mpamatsy zavapisotro misy alikaola ho an'ireo mpivarotra tsy ara- dalàna izay voalazan'ny andalana eo ambony dia saziaina amin'ny fandoavana lamandy ankoatra ny fanejehana azy ara- panjakana, ady madio, ady heloka izay voalazan'ny fehezan-dalàna mifehy ny hetra ary ny lalàna manankery mifehy ny zavapisotro misy alikaola.

ANDININY 76 : Ao anatin'ny faripiadidian'ny Kaominina, ny ora fisokafana sy fikatonan'ny mpamatsy zavapisotro misy alikaola amidy, na hosotroana eo an- toerana na hoentina, dia voafetra araka izao manaraka izao :

- Fisokafana : amin'ny enina ora maraina
- Fikatonana : amin'ny sivy ora alina

Io fepetra io dia tsy mihatra amin'ny:

- Tranombahiny, trano fisakafoana sy trano fandihizana ;
- Toeram-pivoriana sy trano filanonom-bahoaka, an'ny miaramila na an'olo-tsotra izay efa matetika mikarakara hetsika na fety nahazoana alalana ara-dalàna avy amin'ny manam-pahefana eo an-toerana.

SOKAJY 2: FIVAROTANA AMIN'NY TOERANA TSY NAHAZOANA ALALANA

ANDININY 77 : Ny asa aman-draharaha rehetra izay miteraka fivoriana'ny olona maro anaty efitrano (cabinet medical, bar, karaoke, salle de jeux...) dia tsy maintsy ahazoana alalana avy amin'ny tompon'andraikitra mahefa izay ialohavana fitsirihana arahana tatitra ataon'ny tompon'andraikitra ny fidiovana eny an-toerana.

ANDININY 78 : Voarara ary mahavaoa sazy ny fivarotana entana na zavatra hafa rehetra ivelan'ny toerana voatokana na nahazoana alàlana avy amin'ny manampahefana mahefa, indrindra amin'ny sisindalana sy lalambahoaka izay mety hiteraka sakana amin'ny fivezivezena.

SOKAJY 3: NY TRANO SY NY TOERANA METY HITERA-DOZA

ANDININY 79 : Ny fanorenana rehetra ao anatin'ny kaominina dia tsy maintsy ahazoana alalana avy amin'ny manam-pahefana voakasik' izany.

ANDININY 80 : Ny Ben'ny Tanàna dia afaka mandidy ny fandroanana trano fonenana na fotodrafitrasa manamorona ny lalam-bahoaka rehefa nahita ny fitanana an-tsoratra nataon'ny iraka manokana ho amin'izany izay nahavoamarina fa ireo fanorenana ireo dia mety hianjera sy mety hitera- doza ho an'ny vahoaka.

Raha mety hampidi-doza tampoka, ny Ben'ny Tanàna dia manendry tompon' andraikitra handrafitra tatitra ny amin'ny toetoetry ny fotodrafitrasa ao anatin'ny 24 ora. Raha manamafy ny mahamaika na ny fahavoazana lehibe sy tampoka mety haterak' izany ny tatitra, ny manampahefana mahefa dia mampilaza avy hatrany ny tompony ary afaka manatanteraka avy hatrany ireo fepetra ilaina mba hitandroana ny fiarovana ny vahoaka, marihana fa ny tompony no miantoka ny lany rehetra amin'izany.

ANDININY 81 : Voarara ny mametraka amin'ny lalam-bahoaka sy ny miankina aminy, toerana na trano fiasana ho famatsiana sy hikorontana fitaovana amin'ny fanorenana toy ny fasika, vato malao, vatokely, na ny mametraka korontan-javatra, poti-javatra avy amin'ny fandravana, raha tsy nahazoana alalana mialoha avy amin'ny Ben'ny Tanàn'ny Kaominina.

Ireo mpandraharaha nahazo alalana dia tsy mahazo manao kombarika sy rafi- kazo raha tsy nandray ny fepetra manokana mba hiantohany ny fahamafisan'ny kombarika sy ny rafi-kazo, sy ny tsy hianjeran'ny fitaovana sy vatokely araka izay voalazan'ny andalana teo aloha ary ny tsy hanakorontanana ny filaminana sy fizotran'ny fifamoivoizana amin'ny lalambahoaka.

Ny tompony sy ireo mpandraharaha dia samy tompon'andraikitra miaraka ny amin'izay loza mety haterak'ireo asa ireo.

ANDININY 82 : Ny fahazoandalana hampiasa ny lalambahoaka, hametraka toerampiasana sy kombarika manamorona izany lalana izany, mba hanatanterahana ireo asa dia mifanaraka amin'ireo famelan'ny tomponandraikitry ny fanadiovana, izay tokony hanaovana fangatahana mialoha.

Amin'ny tranga rehetra, ny fampiasana ny lalambahoaka sy ireo miankina aminy dia tsy tokony hihoatra ny 48 ora.

ANDININY 83 : Ilay nahazo alalana dia tsy maintsy manala avy hatrany ireo tany noloarana aorian'ny fahavitan'ny ampahan'asa mba hampahalalaka tsy misy fahatarana ny fampiasana ny lalambahoaka. Ny Kominina dia afaka manala an-tery ireo ranontany ary dia afaka mitaky fanomezan-tanana amin'ny mpitandro filaminana raha hitany fa ilaina izany. Ireo faritra anaovana ny asa ireo dia tokony hofefena hatrany amin'ny hazo sy tady na fitaovana hafa mitovy aminy nahazoana alalana.

Tokony hapetraka ho hita tsara manoloana ny toerana hanaovana asa sy ny fitahirizan'entana amin'ny lalambahoaka ny takelaka fampahafantarana na zavatra mampiratra.

Ny Kaomina ihany koa, dia afaka mametraka, na mandidy, raha hitany fa ilaina izany, ny fiambenan'ny olona hiandry ireo toerana hanaovana asa izay ny mpiantokasa no mandoa ny sarany.

ANDININY 84 : Tsy misy afaka manimba ireo fotodrafitrasa isan-karazany toy ny fantsona, fitarihana, efa napetraka, na nataon'ireo andrim-panjakana isan-tsokajiny, na nataon'ny olon-tsotra, raha tsy nahazo alalana manokana avy tamin'ny Ben'ny Tananan'ny Kaomina. Tsy maintsy haverina amin'ny laoniny ireo simban'ny asa natao.

Ny Kaominina dia malalaka amin'ny fampiharana ny fanamboarana ireo fotodrafitrasany araka ny fitaovana ananany ka haloan'ilay nahazo alalana ny lany amin'izany.

ANDININY 85 : Ireo lalambahoaka sy ireo miankina aminy dia raràna tsy azo ampiasaina ho an'ny tombotsoa manokana, toy ny trano garazy, fivarotana zavatra tonta na filalaovana, (babyfoot, billard), fanahazam-bary, fivarotana fasika sy vatokely ary koa ny fivarotana ireo fitaovana fanamboarana trano ka iharan'ny fandraofana ho an'ny tombotsoan'ny Kaominina raha toa ny sandan'ny entana nalain'ny Kaominina. Amin'ny tranga mifanohitra amin'izany, ny mpandika lalàna dia didiana handoa ny sazy mifanaraka amin'izay voalazan'ny didy amam-pitsipika manan-kery.

Ny fanahazan-damba eny amin'ny lalambahoaka sy ny miankina aminy dia faizina amin'ny fanesorana miaraka amin'ny vava ireo lamba miampy fandoavana lamandy sokajy voalohany.

Ireo sakafo mora simba nogiazana dia hatolotra ireo hopitaly sy ireo mpanao asa soa.

Ny fanasana fiarakodia rehetra sy hafa eny amin'ny lalambahoaka sy ireo miankina aminy dia voarara.

Vorara ihany koa ny mijanona na manajanona fiarakodia simba na mandeha, na toy inona toetrany na toy inona, amin'ny lalambahoaka sy ireo miankina aminy.

ANDININY 86 : Voarara tanteraka ny fanaovana ny toeram-bahoaka, tsena, sisindalana, lavarangana na ny toerana rehetra tsy natokana ho amin'izany, ho fonenana na fatoriana.

ANDININY 87 : Ny vaomieran'ny fandriam-pahalemenana, miaraka amin'ny Sampanasa misahana ny fiahiana ny maha olona sy ny fahasalam-bahoaka, dia mandray ny fepetra tsy maharitra mikasika ny olona mirenireny sy ny olona marary saina mba hitandrovana ny filaminan-tsaina, ny fandriam-pahalemana ary ny fiarovana ny fananan'ny tsirairay.

SOKAJY 4: NY KOTABA ATERAKY NY ASA AMAN-DRAHARAH MATIHANINA SY NY HAF

ANDININY 88 : Ity lohateny ity dia natao handaminana ireo tranga sasany, fihetsika sy teny mety hiteraka fanelingelenana amin'ny fitoniantain'ny vahoaka.

ANDININY 89 : Raràna ireo feo manelingelina noho ny hamafiny, eny amin'ny lalambahoaka sy toerambahoaka na ny toerana natao ho an'ny rehetra, indrindra ireo mety ho avy amin'ny :

1. Fanamboarana na fandaminana ny ao amin'ny motera, ankoatra ny fanamboarana mandritra ny fotoana fohy hamerenana ny fampandehanana ny fiara iray tsy afa-nihetsika noho ny fahasimbana tampoka teny ampandehanana ;
2. Ireo dokambarotra amin'ny antso na amin'ny hira ;
3. Ireo dokambarotra izay mitondra fanohintohinana ny rafipisainana sy ny fomba amam-panao ;
4. Fampiasana fitaovana sy fomba fampitana feo amin'ny fanamafisampeo, toy ny vata fandraisana onjampeo, fandraisampeo sy fandefasana kapila, raha tsy hoe ampiasaina manokana amin'ireo fitaovana ireo ny fihainoana mivantana ;

5. Azon'ny manampahefana ao an-toerana omena ihany ireo alalana ho an'olon-tokana na ho an'ny vondron'olona, na eo aza ny fepetra voalazan'ny andalana faha - 4 amin'ity andininy ity. Ireo fepetra ahazoan'ny olona na ny rafitra ampiasana fanamafisampeo dia hofaritan'ny manampahefana izay manome araka ny tranga tsirairay ny fahazoana alalana ilaina amin'izany.

ANDININY 90 : Ny fampiasana zavatra na fitaovana, isan-karazany, mety hiteraka feo na hovitra mafy dia mila fahazoandalana avy amin'ny tompon'andraikitra mahefa.

ANDININY 91 : Ny olona rehetra mampiasa amin'ny sehatry ny asa aman- draharahany, anatin'ny trano na ivelany, amin'ny lalambahoaka na anaty tanàna mitokana, zavatra na fitaovana isan-karazany, mety hiteraka feo na hovitra mafy sy fanakorontanana ny fialana sasatra na ny fitoniantsain'ny mpiara-monina, dia tsy maintsy manajanona izany asa izany anelanelan'ny amin'ny sivy ora alina hatramin'ny dimy ora maraina sy ny tontolo andron'ny alahady sy ny andro tsy fiasana raha tsy noho ny firosahana an-tsehatra vokatry ny hamehana.

ANDININY 92 : Misy alalana manokana noho ny fangatahana omban'ny antony mazava ilàna izany omen'ny sampandraharaha monisipaly, raha hita fa ilaina ny hanatanterahana izany asa izany ivelan'ny ora sy andro nahazoana alalana voalazan'ny andininy etsy ambony.

ANDININY 93 : Ireo tompon'ny trano fanaovana fety aman-danonana dia tsy maintsy manaja izay voalazan'ny fahazoandalana toy ny ora fisokafana.

Tsy maintsy hajaina ihany koa ny fepetra ny amin'ny fanorenana mikasika ny fahadiovana sy ny tsy fivoahan'ny feo mba itandroana ny fahasalamana sy ny fitoniantsain'ny vahoaka.

SOKAJY 5: KOTABA AVY AMIN'NY FITAOVANA AN-TOKANTRANO

ANDININY 94 : Ireo asa fanamboarana na fanaovan-jaridaina ataon'ireo olona manokana amin'ny alalan'ny zavatra na fitaovana mety hiteraka fanelingelenana ny manodidina noho ny hamafin'ny feo, toy ny fanapahana ahitra misy motera, fanapahana, fandavahana, fikikisana na fanapahana mekanika dia tsy azo atao hafa tsy :

- amin'ireo andro fiasana amin'ny 8 ora 30 hatramin'ny 12 ora sy amin'ny 1 ora 30 hatramin'ny 7 ora 30 hariva.
- amin'ny sabotsy amin'ny 9 ora hatramin'ny 12 ora sy amin'ny 2 ora hatramin'ny 5 ora hariva.

ANDININY 95 : Ireo mponina amin'ny toeramponenana na ireo miankina aminy dia tsy maintsy mandray ny fepetra rehetra mba tsy ho voakorontan'ny feo avy amin'ny tranony ireo mpiara-monina manodidina, toy ny vata famoahampeo, firaiketampeo, fitaovana fandrenesampeo sy fahitalavitra, zavamaneno, fitaovana maneno, fitaovana an-tokantrano sy ireo feo ateraky ny fanaovana kiraro mafy faladia na fanatanterahana asa na kilalao tsy mifanaraka amin'ireo trano ireo.

ANDININY 96 : Ny singa sy fampitaovana amin'ny trano dia tokony hotazonina amin'ny hatsarany mba tsy hisian'ny fiharatsian'ny fahafaham – pitazomam-peo rehefa mandeha ny taona, io tanjona io koa dia tokony hampiharina amin'ny fanoloana azy.

SOKAJY 6 : IREO KOTABA ATERAKY NY BIBY

ANDININY 97 : Ireo tompony sy mpiompy biby, indrindra ny alika, dia tsy maintsy mandray ny fepetra manokana rehetra mba hisorohana ny fanelingelenana ny manodidina , amin'ny fampiasana ny fomba rehetra hanerena ireo biby tsy hikorontana miverimberina sy mafy, toy ny fehivava, fanofanana , indrindra koa ny fampidirana azy an-trano raha hiala ny toeramponenana ny tompony .Ireo asa na fanajariana amin'ny lafiny rehetra, atao amin'ny trano dia tsy tokony hisy vokany amin'ny fihenana malaky ny toetra fototry ny fitazomampeon'ny rindrina.

ANDININY 98 : Ny fepetra rehetra dia tokony raisina mba hamerana ny tabataba mandritra ny fametrahana amin'ny trano fitaovana vaovao an'olon-tokana na itambarana.

Ireo fepetra ireo dia hampiharina 'ny sampandraharaha sy fikambanana mahefa araka ny fenitra NFS 31.057 mikasika ny fanamarinana ny kalitao ara-peon'ny trano.

SOKAJY 7- NY AFOMANGA

ANDININY 99 : Ny fanapoahana tsipoapoaka na zavatra hafa manjelatra amin'ny fotoana isan-karazany sy ny fivarotana na fitsinjarana izany entana izany dia ilàna fahazoana alalana avy amin'ny Ben'ny Tanànan'ny Kaominina na ny olona nomeny fahefana ho amin'izany ankoatra izay takian'ireo didy aman- dalàna hafa.

Na dia izany aza, ny fivarotana tsipoapoaka sy zavatra manjelatra dia voarara ho an'ny zatovo latsaky ny 16 taona. Ny fandikana izany fepetra izany dia miteraka fandraofana izany entana izany ary mahatonga ilay mpitana azy ho voasazy handoa sazy vonodina voalazan'ity Fehezam- pitsipika ity ankoatra ny famerenana amin'ny laoniny ireo fahasimbana nateraky ny fipoahana tamin'ny mpifanobobodirindrina.

SOKAJY 8 : NY FANANGONANA OLONA SY NY MPANGATAKA AMORON-DALANA

ANDININY 100 : Ireo olona rehetra manao ny asa fangatahana amin'ny endriny rehetra dia tokony tsy hanakorontana ny mpandeha an-tongotra sy ny mpamily fiarakodia. Izy ireo dia tsy tokony harahina biby masiaka na mety hasiaka, ary tsy tokony hampideradera fitaovana isan-karazany mba hampitahorana ireo olona angatahany. Voarara tanteraka ny mampiasa ny zaza tsy ampy taona ho fitaovana fangatahana.

SOKAJY 9: NY FANIMBANA SY FANAPOTEHANA FANANAM-BAHOAKA

ANDININY 101 : Voarara ny :

- Mamotika na manimba ny fananan'olon-kafa, mihetsika na mitoetra ;
- Mihanika amin'ny lafin-drindrina, amin'ny andrinjira, fitaovam-panazavana sy ny mihanika ny rindrina ary ny tamboho ;
- Mampiasa ireo familiana ny fitarihana na lalandrano isan-karazany, ny famataranoram-bahoaka, ireo fitaovana fanoroana ary ny fanazavana ny lalambahoaka ;
- Mamaritra marika na soratra amin'ny lalana sy ny sisindalana amin'ny alalan'ny akora samihafa;
- Mampaneno lakolosy na mandondona amin'ny varavarana mba hanadalana ireo izay monina ao.

SOKAJY 10: NY FANAKORONTANANA AMIN'NY ALINA SY NY ATOANDRO

ANDININY 102 : Ny tabataba amin'ny alina dia voarara; toy izany ihany koa ny tabataba amin'ny atoandro tsy misy antony voamarina ho ara-drariny. Voasokajy ho tabataba amin'ny atoandro ireo kipantson'ny mpitondra fiarakodia tsy misy antony ara-drariny, ny hiaky ny mpanampin'ny mpamily hiantsoana mpandeha.

ANDININY 103 : Ny lanonana rehetra na andro na alina na misy fahazoandalana aza, toy nyfamadihana sy ny fora zaza, dia tsy maintsy mitandro ny fahasalamana sy ny fitoniantsaim-bahoaka. Anjaran'ny tompondraharaha ny mandray ny fepetra mba ampihenana ny fanenlingelenana mety haterak'izany eo amin'ny manodidina

TOKO VII. IREO SAZY VONODINA

ANDININY 104 : Azo sokajiana ireo sazy sy vonodina vokatry ny tsy fanarahana izay voalazan’ity Fehezam-pitsipika ity ka ny Filankevitra Monisipaly no hanapaka ny taha momba izany.

ANDININY 105 : Ny tsy fanarahana ireo fepetra volazan’ny andininy amin’ity fehezam-pitsipika ity dia miteraka fandoavana sazy araka ny sokajy voafaritry ny Kaominina.

ANDININY 106 : Ireo vola vokatry ny sazy dia azo aloa amin’ny fanehoana tapakila misy sombiny voarangotra sy voasoanian’ny mpandray volan’ny Kaominina.

Natao teto ny

Ny Filan-kevitra ny Kaominina

Ny Ben’ny Tananan’ny

TENY FISAORANA

Fisaorana sy fankasitrahana feno no atolotra ireo rehetra nitoto nahafotsy, nahandro nahamasaka ny famolavolana ity fehezam-pitsipika momba ny fanadiovana sy fidiovana ity mba ho azo ampiasain'ny eny anivon'ny Kaominina ary tolora fisaorana manokana ny WSUP Madagascar izay nanohana hatrany ny Ministera ny Rano sy ny Fidiovana ary ny Fanadiovana nanomboka tamin'ny famolavolana ka hatramin'ny famoahana ity boky ity.



Photo credit : WSUP/Tsilavo Rapiera